



südostschweiz

LA QUOTIDIANA

Redacziun: Via Sommerau 32, 7007 Cuirra, tel. 081 255 57 10, redacziun@laquotidiana.ch



Plaina concentraziun pro las prouvas da la «Engadin Concert Band».

FOTO A. FILLI

Prouvas da musica intensivadas per Montreux

■ (anr/afi) Duos societats da musica da l'Engiadina Bassa e la Val Müstair as participaschan a la 34avla Festa da musica federala a Montreux. Quista festa ha lö dürant las proximas duos fins d'eivna. L'Uniuin Concordia Müstair dombra 28 musicantas e musicants e suna illa terza categoria brass band. Els cumbineschan quista festa güsta eir cun lur viadi da società. La «Engadin Concert Band»

es üna gruppa da proget cun musicantas e musicants chi derivan per gronda part da l'Engiadina Bassa. Quist proget d'eira gnü scritt'oura l'utuon passà e 55 musicantas e musicants s'han annunzchats. Suot la direcziun da Reto Mayer da Scuol as participescha quista gruppa da proget illa seguonda categoria harmonias.

> PAGINA 9



Per rivar a la staziun da Lavin pro'l binari 2 ston ils passagers traversar il prim binari.

FOTO F. ANDRY

Duos variantas pella staziun da Lavin

■ (anr/fa) Da l'on 2023 aintra in vigor la ledscha a regard persunas cun impedimaint. Fin quella jada ston tuot las persunas handicapadas pudair entrar e sortir sainza agüd in edifizis publics ed in trens. Pella Viafier retica (VR) significha quai chi ston gnir dozats numerus perruns e fabricadas diversas rampas. Eir pro la staziun da la viafier a Lavin exista ün uschedit bsögn d'agir.

La VR ha laschà far ün stüdi co chi's pudess accumplir qua las pretaisas da quista ledscha. In marcurdi han preschantà ils respunsabels da la Retica ils resultats da quist stüdi. La prüma varianta prevezza da mantgnair la staziun actuala, la seguonda da fabricar üna nouva staziun tanter Lavin e Sgallians.

> PAGINA 9

LR tranter mazza e martè

Dieta publica da la Lia Rumantscha en la scola auta da pedagogia a Cuirra

DA MARTIN CABALZAR

■ Damaun sonda envida la Lia Rumantscha ad ina dieta publica. A basa da 10 tesas vul ella metter en discussiun tematicas ch'èn relevantas per la cumnanza linguistica rumantscha. Ina dumonda centrala vegn ad esser co ins pudess democratisar las structures dal moviment rumantsch, resp. augmentar la represchantativitad da la LR. La dieta vegn introducida cun referats tematics dals professers Andreas Glaser e Corsin Bisaz che preschentan pussaivladads d'adattar las structures da la LR uschia ch'ella represchenta la Rumantschia a moda pli directa. Alura propona la doctoranda Barbla Etter vias pussaivlas per rinforzar il rumantsch en cumparegliaziun cun il tudestg. La lingua rumantscha dispona bain d'ina buna basa legala, ma en la pratica regna savens in pragmatism da la bilinguitad nua ch'il tudestg gioga la rolla dominante. Etter sa dumonta co ins pudess augmentar valor e prestige dal rumantsch.

A basa da 10 tesas vegn alura discutà en lavuratoriis ed en il plenum davart structures ed accents da la promoziun dal rumantsch en l'avegnir. Sco quai che il parsura da



Ils referats introductivs fan ils professers Andreas Glaser e Corsin Bisaz (da san.).

FOTO F. ANDRY

la LR Johannes Flury s'exprima en La Quotidiana dad oz na chape-scha el betg questas tesas sco puziuns gia cleras, mabain plitost sco propostas e stimul per la discussiun. La LR stettia avant decisiuns e midaments fundamentals e perquai veglia ella savair da Rumantschas e Rumantschs tge ch'els

pensan, nua ch'i dat basegn d'agir. Per Flury n'ha la LR betg primar-main in deficit da democrazia, mabain plitost da represchantativitad. Quai sa mussia cunzunt en las discussiuns actualas davart rumantsch grischun ed idioms en scola. Da resguardar saja er il fatg ch'ils «territoris da tschep» erode-

schian, entant ch'il dumber da Rumantschs en la diaspora creschia. Il rumantsch giardia ina gronda simpatia en Svizra, ma vegnia savens anc adina percepi en il Grischun sco «disturbi» e main sco enritgament, deplorescha Flury.

> PAGINA 3

La galleria dil Scopi duei vegnir prolungida

Sentupada dils ministers da traffic dil Grischun e Tessin cun la Pro Lucmagn

DA HANS HUONDER / ANR

■ Ils proxims onns preveda il cantun Grischun d'investar 65 milliuns francs ella via dil Pass Lucmagn. Medemamein duei la galleria dil Scopi vegnir prolungida. Ier ein ils cussegliers guvernativs Mario Cavigelli dil Grischun e Claudio Zali dil Tessin – ils ministers da traffic – s'entupai ad Acquacalda cun representants dalla Pro Lucmagn. El center ein las mesiras per la migliur dalla via e dalla segirtad stadas. Sco quei che Cavigelli ha saviu comunicar investescha il Grischun ils proxims quater onns 15 milliuns francs ella via denter Mustér e Curaglia. Otg milliuns vegnan impundi per la via denter Curaglia e Fuorns ed el decuors dils proxims diesch onns ein investiziuns da 42 milliuns francs prevedidas ella sanaziun da gallerias al pass. Medemamein duei la galleria dil Scopi vegnir prolungida enviers nord ils proxims diesch onns. Ils cuosts persuerter ein calculai cun ogt entochen diesch milliuns francs.



Ils cussegliers guvernativs Mario Cavigelli e Claudio Zali sco era il vicepresident dalla Pro Lucmagn Matteo Baggi ed il president e cusseglier nazional Martin Candinas (da sen.).

FOTO H. HUONDER

Aschia savess la segirtad vegnir migliurada considerablamein. Davart dil Tessin sa vegnir sittau lavinas egl avegnir el territorii d'Ac-

quacalda, in liug neuralgic da lavinas. Plinavon ein mesiras forestalas prevedidas. Il president dalla Pro Lucmagn, Martin Candinas, ei

cuntents culs projects previ. El ei sestentaus per la sentupada dalla gievgia. Sch'ei va tenor el ei ina talla prevedida egl avegnir regularmein.



Servetsch d'abunents e da distribuziun: tel. 0844 226 226 mail: abo@somedia.ch